



Evolución e análise do Acordo sobre medidas que melloran o funcionamento do sistema educativo (04/04/2025)

As organizacións sindicais CCOO Ensino, ANPE e UGT-SP comparecemos publicamente para denunciar a falta de cumprimento íntegro do *Acordo sobre medidas que melloran o funcionamento do sistema educativo*, asinado coa Consellería de Educación, Ciencia, Universidades e Formación Profesional da Xunta de Galicia. **A situación, logo de case un ano e medio da sinatura, esixe unha resposta clara por parte da Consellería e do Presidente da Xunta, que ao fin e ao cabo, foi a persoa que asinou dito Acordo.**

A nosa denuncia principal é que a **Lei 5/2024 de medidas fiscais e administrativas** non garante a execución do Acordo. Pola contra, **estase a utilizar como ferramenta para entorpecer a aplicación de compromisos asinados** —como a dotación de profesorado de apoio— **e para dilatar no tempo outros aspectos fundamentais**, como a redución progresiva de *ratios* no marco do *Acordo de agrupamentos*.

A situación actual revela feitos gravísimos que queremos facer chegar a toda a comunidade educativa e á sociedade galega:

- Existe unha **interpretación restrictiva e obstrucionista** por parte da Dirección Xeral de Ordenación e Innovación Educativa, a Subdirección Xeral de Inspección e Avaliación do Sistema Educativo e das xefaturas territoriais da Inspección. **Sexa por acción ou por omisión, o certo é que se están freando de forma sistemática os avances pactados no Acordo.**
- Non se nos facilitan **datos obxectivos e esenciais**, como as cifras reais de matrícula ou as "fotos fixas" por grupo escolar, **necesarias para comprobar a aplicación das novas *ratios***. Alén diso, **algúns equipos directivos recibiron ameazas por parte da Administración** para que non colaboren coas organizacións sindicais nin faciliten ningún tipo de información.
- **O Presidente da Xunta, Alfonso Rueda, é asinante do Acordo.** Con todo, **véñense ignorando as numerosas solicitudes de reunión** presentadas por escrito polas organizacións sindicais asinantes, en diferentes datas e canles. **Reclamamos unha entrevista directa co máximo responsable político do enfoque que se lle está dando ao cumprimento deste Acordo.**

Ante esta situación, os sindicatos asinantes **estamos a esgotar os prazos legais da vía administrativa para dar o paso á vía xudicial con garantías**. Este camiño, lento pero sólido, é a nosa aposta por un **sindicalismo serio, firme e eficaz, centrado en acadar resultados reais para o conxunto do profesorado galego**. Xa

temos en marcha o proceso contencioso-administrativo e a nosa aspiración é que se resolva cunha [sentenza semellante á da Comunitat Valenciana^{\[1\]}](#), que obrigou alí ao goberno autonómico a contratar case 2.000 docentes por incumprimento dun acordo similar. Do mesmo xeito, tamén presentamos unha **reclamación administrativa pola aplicación incorrecta do 10 % de incremento nos complementos de sexenios e titoría. Esta reclamación será acumulada no proceso xudicial para reclamar todos os dereitos vulnerados.**

Chamamos a **toda a Comunidade Educativa a que se implique activamente e denuncie as situacións de incumprimento**, como o recente intento da Consellería de volver aplicar *ratios* de 25 alumnos en Infantil e Primaria, especialmente na área de Vigo, aínda que tamén noutras zonas de Galicia. Este proceder, denunciado publicamente polos centros, e a reclamación das organizacións asinantes, obrigou a Consellería a dar marcha atrás e **cumprir no proceso de admisión de alumnado as *ratios* que recolle o Acordo.**

Queremos rematar agradecendo aos sindicatos que non asinaron o Acordo e que o denominaron no seu momento como "*Acordo da miseria*", que **hoxe reclamen vehementemente a súa aplicación**. Instámoslos, por coherencia, a que se sumen ao mesmo coa súa sinatura e axuden a construír a unidade sindical que demandan noutros contextos e que se aplica con éxito noutras comunidades autónomas.

A diferenza entre quen se limita a protestar e quen traballa con rigor por avances concretos é que só as organizacións que asinamos e defendemos o Acordo estamos acadando constantemente conquistas reais para o profesorado galego.

A nosa folla de ruta está clara: denuncia pública, mobilización, acción institucional e vía xudicial. Seguiremos a esixir o cumprimento íntegro do Acordo ata as últimas consecuencias. Porque cumprir os acordos non é unha opción: é unha obriga.

Para máis información,

Borja Campos Seijo

Secretario de persoal docente de
ensino público non universitario da
Federación de Ensino de CCOO Galicia
636 358 841

Julio Díaz Escolante

Presidente de ANPE Galicia
615 226 371

Sandra Montero Nogareda

Secretaria do sector de Ensino UGT-SP
698 137 388